

Parlamentario Benny Sevinger (AVP)

Nel sa masha bon kiko Rudy ta haci

E uno ta tapa pa e otro!

ORANJESTAD (AAN) "Mi no por kere locual mi a tende Promer Minister Oduber bisa, esta cu e no sa nada di asuntonan straño rond di dunamento di permiso", e parlamentario Benny Sevinger a expresa.

"Despues cu mi a publica e Ministeriele Beschikking den cual ta resalta e

hecho cu Minister Rudy Croes ta decidido di tene e asunto di dunamento di permiso den su man y mi a mostra riba e tantísimo casonan dudoso cu ta tumando lugar rond di dunamento di permiso", Benny a laga sa. "Mi no por kere cu Promer Minister Oduber ta bisa cu e no sa nada di e casonan aki.

"Desde aki mi kier ex-

presa na Promer Minister Oduber cu algun di e informacionnan clave cu nos a haya ta di personanan hopi serca di Promer Minister Nelson Oduber mes. Y nan a informa nos cu nan a pone Promer Minister Oduber tambe na haltura. Nan tambe a keda asombra cu Promer Minister Oduber no ta haci nada.

"Nos no ta asombra", Sevinger a expresa, "pasobra esnan cu ta worde menciona den e asuntonan aki ta personanan clave den partido MEP. Na tur momento mi ta dispuesto pa bay informa Promer Minister Oduber di nomber y fam cu ta worde menciona den e casonan aki. E ta un escandalo di corrupcion nunca bisto den historia di Aruba. Un negoshi di permiso cu un red cu ta cana te den oficina di Ministernan.

"Nos tin un file completo di evidencia cu nos a

entrega na Algemene Rekenkamer, pero te awe nos no a tende nada. Ainda Rekenkamer ta keda investiga e gobierno anterior. Siete aña largo Rekenkamer a investiga e gobierno anterior y awor e ta sigui cu e gobierno anterior. Fraccion di AVP a entrega un file completo riba e proceso dudoso rond di e proyecto miyonario di dump na Rekenkamer y a entrega un file completo riba asuntonan dudoso den dunamento di permiso. E documentonan aki ta muestra con Minister Rudy Croes ta pusha pa cierto hende haya permiso promer cu otro y tambe ta muestra con Rudy Croes ta duna orden pa laga hende deporta drenta Aruba. E documentonan aki ta muestra tambe con Minister Rudy Croes ta yama miembronan di imigracion y pone presion riba nan pa

laga hende drenta na aeropuerto cu ta aparece riba lista di personanan cu no mag di drenta Aruba mas.

"Mi ta duda cu Promer Minister Oduber no ta na haltura di tur e asuntonan aki y cu Promer Minister no tin e mesun informacion cu nos tin di red di negoshi di permiso cu tin ta tumando lugar den su gobierno," e parlamentario di AVP a bisa.

E cosnan aki ta asuntonan grave y ta parse manera Promer Minister Oduber ta purba bagetelisa e asunto. E unico interpretacion cu nos por yega na dje ta cu "un ta tapa pa otro". Na tur momento mi ta dispuesto di informa Promer Minister Oduber di locual nos tin na informacion, si enberdad e ta interesa pa sa." Asina e parlamentario di AVP, Benny Sevinger, a finalisa bisando.

Debi na Areglo di Gobierno anterior:

Compania cu lo cumpra refineria di Aruba lo goza di tax Holiday te 2012

ORANJESTAD (AAN)-- E "tax holiday" cu Gabinete Oduber-1 a otorga e refineria Coastal como un incentivo den temponan dificil, ora nan a habri na Aruba, mester a caduca definitivamente na 2001 y 2003.

Pero gobierno di AVP prome a a baha (di su ultimo gobernacion), a renova tres "tax holiday" pa e compania, segun Minister Presidente Nel Oduber a bisa, pa contesta a un pregunta di prensa. Premier Oduber a splica cu e "tax holiday" pa El Paso, of cualquier otro compania cu tuma over e refineria, lo expira te, mas of menos, na 2012.


Esaki kiermen cu esnan cu lo sigui opera Aruba su refineria ta exonera di impuesto pa por lo menos siete aña mas.

Tempo cu Gabinete Oduber Uno a negocia cu Coastal, e gobierno no tabata para firme, pasobra e refineria tabata ser desmantela y nan a cuminsa opera sin nada, pero aworaki gobierno tin e instrumentnan pa un mehor negociacion.

Minister Presidente a agrega cu e refineria ta haya exoneracion di impuesto pa Rehabilitacion y Delay Cocker #1 y #2.

Kiermen, cu otro compania cu bin cumpra e refineria, automaticamente e kier cumpre cu e condicionnan cu tin di establecimiento.

MAS TRANSPARENCIA!!



E CD PA COMPUTER CU WEGANAN POLITICO ARUBANO TA OBTENIBLE NA CAMACURI SNACK PARIBA DI VELD DI CLUB CARIBE Y TAMBE NA TUR CHECKPOINTCOLOR. PA INFO Y DELIVERY YAMA TEL: 5828006 WWW.WEGAWEGA.COM

TELEFONNAN
582-6747
FAX
582-8551